

**La Lettre Jèrriaise sanm'di lé treize dé Févri 2021.**

**Bouônjour bouonnes gens. Ch'est Jean L'Maistre tch'a l'pliaïsi dé vos présenter la lettre Jèrriaise aniet, sanm'di lé treize dé Févri deux mille vîngt-tch'ieune.**

**Ch'est tréjous eune tâche intérèssante à chèrchi un sujet à propos pour chutte lettre.**

**Eh bein, chutte fais pour c'menchi, j'ai pensé qué la chose exceptionnelle dreinement ch'est combein d'plyie qué j'avons ieu ch't 'hivé jusqu' ach'teu. Ch'est încriyabl'ye dé vaie l'ieau dans les clios et sustout dans les mielles autou d'la Crabiéthe. En v'nant dés Laveurs ch'est à la drouaite dé l'autre côté d'la route quand nous arrive à la Mielle dé Morville. L'ieau est exactément comme eune p'tite Mathe au Seigneur aue` un îlot dans l'mitan. L'ieau est presqu' au nivé d'la route, cèrtainement pus haute qué jé janmais veu!**

**V'là tchi m'fait penser ès pouôrrès fèrmièrs tchi sont en train d'plianter lus patates. Ch'est lé c'menchement d'eune nouvelle saison et i' continuent lé travas tchi c'menchi l'année pâssée. L'année pâssée il' avaient plianté la s'menche dé patates, les foui et les rentrer dans l 'solyi ou à ch't'heu dans les grands haûgards. Éventuellement, mâter les patates, à ch't'heu avec des bieux jets i' sont prêtes à plianter. Mais, à cause du temps i' y'a pas moyen et les travailleurs ont presqué rein à faithe.**

**J'sis- t-i content dé n' être pas d'autre à fèrmer quand j'vai tout l'travas qu'il' ont à faithe et à ch't'heu, à cause du temps, i' peuvent rein faithe. Tchi sâpré câsse-tête!**

**V'là tchi m'fait penser combein dû, combein difficile qué ch' 'tait pour la généthâtion dé mes pathents. Dans lus cas, i' n'avaient pon héthité d'eune fèrme. Nan valet! Fallait c'menchi au tout bas d'l'êchelle! Il' avaient c'menchi aue un p'tit côti d'à bein près trente pèrques juste en d'ssus du p'tit mont tchi s'appelle Le Mont des Routeurs mais connu étout comme Crusoe à la Ville Bagot à St Ouën.**

Tout l'travas 'tait fait à la main et l'côti était rapide. I' n'fallait pas aver des rhonmatisses ou être court d'haleine!

Éventuellement ils eûdrent la chance dé louer eune p'tite fèrme qu' appartenait à la tante dé ma méthe. Auve tchiques clios v'là tchi lus donnit la pôssibilité d'acater un j'va et tchiques ôtis et un hèrnais.

Presqué tout l'travas 'tait fait à la main sinon pour la touônn'nie, la griffonn'nie, l'hèrchage et la tchéthue à plianter qu'était tout fait avec lé j'va.

Pouor la pliant'tie, par exempl'ye, comment qu'la faithe à changi. Dans chu temps là nou 'tait souvent chîng plianteurs pouor pouver faithe lé tou du clios et nou pouver plianter quatre ou chîng vrégies par jour.

Ach'teu, ch'est comme des freunmions quand nou vait les travailleurs dans les clios. Souvent nou les vait arrivé à sept heuthes du matîn et si lé clios est p'tit ou grand, tout est finni et clièrgi par méjeu !

Bein seux ch'est les grandes machinnes qu'ont changi tout. Tchique fais j'mé d'mande si, à l'av'nîn nou r' grett'a d'aver utiliser des ôtis qu 'étaient si pésant et lé damage tchi peut êt' fait souos terre. L'évidence, en partie, est p' t 'être déjà là comme dreinement nous a veu l'ieau couôrre hors des clios et dans les routes. Ch'là 'tait exceptionnelle lé temps passé pa'ce qué fallait pas cachi du tout sus la terre après la touônn'nie pour maînt'nîn la terre meubl'ye et en bouonne condition. Ch'est pouor chenna qué l'fèrmyi aime vaie les p'tits, et tchique fais même des gros vèrs, dans la terre!

Ch'la est un aut' sujet hardi întérèssant qué j'n'ai pas assez d'temps d'entamer aniet. Eh bein bouonnes gens, n'en v'là assez pouor chute semaine et mèrcie pouor m 'avé êcouté à matîn.

Restez sauf, et à la préchaine.